

BOSNA I HERCEGOVINA  
FEDERACIJE BOSNE I HERCEGOVINE  
VRHOVNI SUD  
FEDERACIJE BOSNE I HERCEGOVINE  
Broj: 56 0 Rs 055078 17 R  
Sarajevo, 21.03.2017. godine

Vrhovni sud Federacije Bosne i Hercegovine u Sarajevu u vijeću sastavljenom od sudija: Radenka Blagojevića, kao predsjednika vijeća, Mirjane Dević i Marijane Omerčaušević, kao članica vijeća, u pravnoj stvari tužitelja M.K. iz M., protiv tuženog V. škola ..., M., radi spora iz radnih odnosa, odlučujući o prijedlogu tužitelja da u predmetu Općinskog suda u Konjicu broj: 56 0 Rs 055078 16 Rs postupa stvarno nadležan sud u drugom kantonu, u sjednici vijeća održanoj dana 21.03.2017. godine, donio je:

## **R J E Š E N J E**

Prijedlog se odbija.

## **O b r a z l o ž e n j e**

Tužitelj je dana 30.01.2017. godine podnio prijedlog ovom sudu da se za postupanje u ovom predmetu odredi stvarno nadležan sud u drugom kantonu.

Kao razloge za delegaciju nadležnosti tužitelj navodi da je Kantonalni sud u Mostaru na prijedlog Općinskog suda U Mostaru iz organizacionih razloga delegirao njegov predmet na dalje postupanje kao stvarno nadležnom Općinskom sudu u Konjicu. S obzirom da je sud u Konjicu udaljen od prebivališta tužitelja 70 km, na taj način ću biti izložen troškovima, pa iz tih razloga predlaže da za postupanje u ovoj pravnoj stvari se odredi kao stvarno nadležan Općinski sud u Širokom Brijegu.

Prijedlog nije osnovan.

Prema odredbi člana 50. stav 2. Zakona o parničnom postupku ("Službene novine F BiH" 50/03, 73/05, 19/06 i 98/15 u daljem tekstu: ZPP), ovaj sud može, na prijedlog stranke ili nadležnog suda, odrediti da u pojedinom predmetu postupa stvarno nadležan sud u drugom

kantonu ako je očito da će se tako lakše sprovesti postupak ili ako za to postoje drugi opravdani razlozi.

Ovaj sud smatra da u konkretnoj pravnoj stvari nisu ispunjene pretpostavke iz člana 50. stav 2. ZPP ( „Sl. Novine F BiH br.53/03, 73/05, 19/06 i 98/15) za delegaciju.

Okolnosti na koje se tužitelj poziva, po ocjeni ovog suda ne mogu se podvesti pod one koje ima u vidu naprijed citirana zakonska norma, jer određivanje da u pojedinim predmetima postupa stvarno nadležan sud u drugom kantonu obzirom na ustavom uređenu organizaciju sudske vlasti mora biti izuzetno i opravdano posebnim razlozima koji po ocjeni ovog suda u konkretnom slučaju ne postoje.

Razlozi za delegiranje drugog stvarno nadležnog suda sa područja drugog kantona moraju biti izuzetnog značaja, jer samo takvi razlozi opravdavaju odstupanje od Ustavom Federacije BiH razgraničene teritorijalne nadležnosti sudova u kantonalnom uređenju sudske vlasti u Federaciji BiH.

Kako se okolnosti na koje se tužitelj poziva po ocjeni ovog suda, ne mogu podvesti pod opravdane razloge koje ima u vidu odredba člana 50. stav 2. ZPP-a, to je valjalo riješiti kao u izreci.

Predsjednik vijeća  
Radenko Blagojević s.r.